


ALAHADY FAHA 23 MANDAVANTAONA - B



« Tsara avokoa ny zavatra rehetra nataony, fa nampalady ny marenina lzy sy nampiteny ny moana » (Mk. 7: 37)»

Ry Kristianina havana, misy fotoana eo amin'ny fiainantsika maro ny zavatra mifamahofaho sy manahirana ary mahakivy ka very fanahy mbola velona isika miatrika ireny zava-misy mikiky ny fiainantsika mampitebiteby antsika ireny. Tsy Andriamanitra lavitra nefa ny Andriamanintsika fa akaiky sy miara-dàlana amintsika mandrakariva ary nanolotra ny ainy ho fanavotana antsika sy mikarakara ary mikolokolo antsika ny Andriamanintsika.

Izany ny tian'ireo vakiteny telo asongadina amin'izao Alahady faha 23 tsotra mandavantaona handalinantsika ny finoantsika fa indrindra ny fiatrehintsika ny aorian'ny filankevitra pastôraly ka hivelomantsika ny vokatr'izany. Indraindray maro ny olana tsy maintsy sedraina, mampianatra antsika ny Tenin'Andriamanitra fa Andriamanitra miara-dàlana amintsika mandrakariva fa indrindra

ny vakiteny voalohany ao amin'ny bokin'Izaia mpaminany ,
“Ilazao ny mitebiteby fo ataovy hoe: Makà hery fa aza matahotra.” Maro no mety manahirana antsika fa Andriamanintsika dia mikolokolo sy manasitrana antsika, izany koa ny voalazan'ny Evanjely androany ; namakivaky tànana maro i jesoà, mamakivaky ny fiainantsika izy ka

Vakiteny I : Iz. 35, 4-7a
Tononkira : Salamo 145
Vakiteny II : Jak. 2, 1-5
Evanjely : Mk. 7, 31-37

raha mampiditra sy mampandroso azy eo anivon'ny fiainantsika isika dia ireo zavatra manahirana antsika voalaza tahaka ilay moana sy maharenina ao amin'ny evanjely dia ho sitranin'Andriamanitra. Maro ny zavatra mahamoana isika sy mahatonga ny sofintsika tsy mitandregny, maro ny zavatra tsy resintsika satria araka ny voalaza teo dia isika tsy miaraka amin'Andriamanitra. Manatona antsika Andriamanitra milaza hoe “Efata”, izao koa no hanokafan'Andriamanitra ny sofintsika sy haniratanany

ny masontsika, izany no antenaintsika ho tena vokatr'izao filankevitra pastoraly izao ka ny anjarantsika dia ny mampiditra an'Andriamanitra amin'ny fiainantsika.

Sokafin'Andriamanitra ny masom-pinoantsika sy ny masom-panahintsika, marary ny tontolo telo iainantsika izay fototra ny maha-olona, azo lazaina aza fa mahajamba antsika ka tsy hahitantsika intsony ny lalan-kombana ka manasempotra ny sofintsika izay tsy handrenesantsika ny hafatry ny konsiansy izay maha olona antsika, tsy hoe feon'ny fieritreretana fotsiny ny konsiansy fa tena ny maha olona antsika mihitsy izany tena ny dikany ny hoe "konsisans". Ireo tontolo telo dia sempotra sady maharenina no jamba ka very fanahy mbola velona isika izany hoe ny mahaolona mihitsy no potika

Dia ny tontolon'ny zava-boahary manodidina antsika izay efa mitaraina ary mahatsiaro ho vaky izy satria potika indrindra. Eo indrindra no iantsoana antsika, EFATA, misokatra ny masontsika ka hiezaka isika hikorokoro ny tontolo iainantsika. Fa raha voakorokoro tsara izany dia hivelatra ny fiainantsika. Izany ny dikany maintso, feno fanantenana isika. Iza no fotoana tsara hiezahantsika amin'ny fanavaozana izany satria taranaka mpanorina isika ka hikorokoro sy hanaja ny tontolo iainantsika. Amin'izany dia hilaza isika fa tsara avokoa ny zavatra rehetra nataony satria nampiteny ny moana izy no nampalady ny marenina. Tsy hanao tahaka ny taloha intsony isika fa hanavao ny fiainantsika ka hanaja ny tontolo iainana.

Toy izany koa ny tontolom-piainantsika, raha misokatra tokoa ny fo amam-panahintsika araka ny voalaza teo nosokafan'i Jesoa ny fontsika, masom-piainantsika dia hifanaja isika, hampanjaka ny rariny sy ny hitsiny, hikatsaka ny soa indrindra ary hiezaka hatrany hanitatra ny fihavanana ampianaran'Andriamanitra ao anatin'ny fifankatiavana. Tontolom-piainana hanjakan'ny fifankatiavana tokoa ka hisokatra ny fiainantsika. Aoka hamboly famindrampo isika loharano sy fototra ny fandriampahalemana sy fihavanana

Toy izany koa ny tontolon'ny fiainam-pinoana ka hivelona amin'ny maha zanak'Andriamanitra antsika ka hiverina amin'ny toetra naharian'Andriamanitra antsika dia ny itovizantsika endrika aminy. Izany fanasitranana andrandraintsika avy amin'i Jesoa ka hahatonga antsika hiloa-bava tahaka ireo olona nahita azy talanjona ka nilaza hoe tsara tokoa ny zavatra rehetra nataony, nampalady ny marenina izy sy nampiteny ny moana

Ny hivelomantsika izany rehetra izany fa indrindra aorian'ny filankevitra pastoraly dia misy torohevitra mazava amin'ny maha Kristianina antsika ka hahatonga antsika ho Kristy mpiara-belona amin'olona, hitantsika ao amin'ny vakiteny faharoa mananatra antsika mba tsy hizaha tavan'olona; Ny finoana an'I Kristy dia tsy mba manilika fa mampiombona, mampiray ary izany no mahatonga antsika ho taranaka mpanorina tokoa ary ao anatin'ny fanorenana izany no mahatonga antsika manavao ny zavatra rehetra araky ny hira izay ataontsika hoe Ry Tompo Andriamanitra Andriananahary.

Ry Jesoa Tompo ô ianao namakivaky ny tãnana, enga anie hamakivaky ny fiainanay tsirairay, ny fiainan'ny fianakaviana eglizy kely, hamakivaky ny eglizy iombonana, hamakivaky ny eglizy fototra ka hizara ny fahasoavanao ka hahatonga anay hisokatra maso sy hisokatra sofina ka hahare ny

hafatrao. Ianao hamakivaky ny firenenay amin'izao fotoan-tsarotra izao ka hiova ny fonay, ho sokafanao tokoa ny fonay ka hitoetra ao aminao

Ry Jesoa Tompo ô, matetika izahay manakotra ny masonay sy ny sofinao ka tsy maheno ny antsom-pitiavanao, eo koa ny henatra sy ny tahotra ka mahatonga anay tsy ho vavolombelona, ka izao ary ny fotoana tsara, izao no andro hasoavana ka sokafy ny fiainanay mba ho fiainana misy anao tokoa izahay ka ianao hitoetra eo anivonay ary izahay hitoetra eo anivonao ka hamokatra ao anatin'ny fiadanana sy ny hafaliana mba hahatonga anay tokoa ho zanak'Andriamanitra. Amen

Mompera Arseveka Mgr Benjamin Ramaroson